

摘藻堂四庫全書薈要

史部

欽定四庫全書薈要

史部
文獻通考卷六十

詳校官員外郎臣潘紹觀



欽定四庫全書薈要卷九千三百八十

史部

文獻通考卷六十

鄱陽馬端臨貴與著

職官考十四

東宮官總叙

凡三王教世子必以禮樂樂所以修內禮所以修外禮
樂交錯於中發形於外是故其成也懌恭敬而溫文

心中

也懌
悅也

立太傅少傅以養之欲其知父子君臣之道也

言養

者積浸
成長也

太傅審父子君臣之道以示之少傅奉世子以

觀太傅之德行而審諭之太傅在前少傅在後

謂其在學時也

入則有保出則有師

謂燕居出入時也漢班彪上書曰昔成王為孺子出則周公召公入

則太顛閔天南宮道散宜生左右前後皆正禮

是以教諭而德成也師也者教

之以事而諭諸德者也保也者慎其身以輔翼之而歸

諸道者也

慎其身者謹安護之

秦漢以下始加置詹事中庶子及

諸府寺等官亦有以他官而監護者

漢孝宣帝欲令中郎將許舜監護太

子家疏廣以為示狹非所以廣太子也後漢順帝立太子居承光宮以侍御史种暘監護有中常侍卒乘衣車

來載太子太子太傅杜喬憂懼不能止開門將出而暈至手劍當車曰太子國之儲副人命所繫常侍來無尺一何以得將太子去何知不與內寵姦臣共挾邪謀今日之事有死而已乃遣喬詣臺啟白得中奉敕乃聽之自魏明帝以後久曠東宮制度闕廢官司不具

吳孫權即位孫

登為太子兼置四友等官以諸葛恪為左輔張休為右弼顧譚為輔正都尉陳表為翼正都尉是為四友於是東宮號為多士晉初詹事左右率庶子中舍人諸官並未置惟

置衛率令典兵二傳并攝眾事至咸寧元年始置詹事以領宮事宋孝武置東宮率更令等官其中庶子庶子中舍人舍人洗馬各減舊員之半後周加置太子諫議

員四人至隋罷詹事分東宮置門下坊典書坊

北齊已
有典書

坊以分統諸局

北門下內
史二省

門下坊有左庶子二人內舍

人四人錄事二人統司經宮門內直典膳藥藏齋師等

六局典書坊有右庶子二人舍人通事舍人各八人領

內坊唐置詹事府以統衆務置左右二春坊以領諸局

龍朔二年改門下坊為左春坊典書坊為
右春坊咸亨初復舊景雲元年又改為之

左春坊置左

庶子二人中允二人司議郎四人錄事二人左諭德一

人左贊善大夫五人崇文館校書郎八人亦統六局

六局

之中唯改齋師為典設餘局名與隋同其六局長官唯司經置洗馬宮門置大夫餘各置監以局名冠之所職如其名龍朔中改宮門大夫及諸監並為郎遂為永制也

右春坊置右庶子二人中

舍人二人舍人四人錄事二人右諭德一人右贊善大

夫五人通事舍人八人兼領內坊

內坊置典內二人掌閤內諸事諸坊局小

吏各有差因隋制也

宋仍唐制東宮有六傅下至率更令僕右官存而無職司至道元年建儲闡置賓客二人左右庶子諭德中舍各一人並以他官兼充左右春坊鑄印置吏員及太子

登極則省春坊司累朝皆然真宗在東宮建堂習射名

繼照堂有勾當官三人

以諸司使及內侍充

仁宗在東宮肄學建

堂名資善堂有都監一人

以入內侍都知押班充

太子六傳

太子師保二傳殷周已有逮乎列國秦亦有之

孝公時商鞅設

法黥太子師傳是也

漢高帝以叔孫通為太子太傅位次太常後

亦有少傅

高帝東征留太子監關中兵謂張良曰子房雖病強卧而傳太子時叔孫通為太傅留侯

行少傅事又疏廣字仲翁為太傅兄子受為少傅父子並為師傳朝廷以為榮又韋元成丙吉並為太傅又匡

衡王丹並
為少傅

後漢太傅禮如師不領官屬而少傅主太子

官屬漢魏故事太子於二傅執弟子禮皆為書不曰令

少傅稱臣而太傅不臣

吳薛綜綜子瑩瑩子兼
三代並為太子少傅

晉太始

三年武帝始建置東宮各置一人尚未置詹事官事無

大小皆由二傅少傅立草太傅書真以為儲訓並有功

曹主簿五官秩與後漢同皇太子先拜諸傅然後答之

如弟子事師之禮二傅不得上疏曲敬武帝後以儲副

體尊遂命諸公居之以本位重故或行或領時侍中任

愷武帝所親敬復使領之蓋一時之制也咸康元年以
給事黃門侍郎楊珧為詹事掌宮事二傳不復領官屬
及楊珧為衛將軍領少傳復省詹事遂崇廣傳訓命太
尉賈充領太保司空齊王攸領太傅所置吏屬復如舊
二傳皆追賢兩梁冠黑介幘五時朝服佩水蒼玉

晉令曰太

子太保銀印青綬

其後太尉汝南王亮車騎將軍楊駿司空衛

瓘石鑒皆領保傅猶不置詹事以終武帝之代惠帝元

康元年復置詹事

二傳給菜田六頃田騶五十人夏後不及田者食俸一年給赤耳安車一

乘

又愍懷建宮乃置六傅三太三少以景帝諱師故改

太師為太帥通省尚書事詹事文書關由六傅

職官要錄曰晉

太子六傅各

有丞一人自元康之後諸傅或三或四或六渡江之

後有太傅少傅不立師保宋有太傅少傅各兼丞一人

其保傅並銀章青綬齊與宋同武帝時以王儉為少傅

舊太子敬二傅同至是朝議接少傅以賓友之禮梁太

傅位視尚書令少傅視左僕射

職官要錄曰三少舊視左僕射冠服同三太也

陳因之自宋以下惟有傅而無師保後魏有太師太傅

太保謂之東宮三師少師少傅少保謂之東宮三少

孝明

在東宮宣武皇帝欲以霍光為太子師傅光固辭帝令太子南面再拜宮臣皆從太子拜光北面立不敢答拜唯西面拜謝而出

北齊皆有之出則三師在前三少在

乃授光太子少傅

後後周不置隋與北齊同唐六傅不必備唯其人太子

出則乘輅備儀以為後從貞觀中太宗撰太子接三師

之儀出殿門迎太子先拜三師答拜每門讓三師坐與

三師書前名惶恐後名惶恐再拜

先天元年十二月詔東宮三師三少宜開

府置令丞各一人
隸唐事府尋罷

宋朝師傅不常設仁宗升儲置三少各一人李文定公
昉以參知政事兼掌賓客及陞左相遂進兼少傅此宰
相兼宮僚之所從始也丁謂兼少師馮拯兼少傅曹利
用兼少保是時實為東宮官餘多以前宰相官未至僕射者及樞
若太子太師太傅太保以待宰相官未至僕射者及樞
密使致仕亦隨本官高下除授太子少師少傅少保以
待前執政其少師非經顧命不除若本官至尚書即除
少傅丞郎給諫只除少保若因遷轉則遞進一官至太

師即遷司空矣天禧末皇太子同聽政乃以首相兼少師樞密曹利用兼賓客自後神宗欽宗孝宗光宗在東宮皆不置開禧三年史同知弼遠自詹事入樞府乃進兼賓客已而太子侍立遂以錢丞相象祖兼太子少傅明年景獻太子立並置二相錢左相改兼少師史右相兼少傅未幾右相丁內艱左相亦去位又明年右相起復遂進兼少師焉

太子賓客

漢高帝時有四人年老以上慢侮逃匿山中義不為漢

臣謂之四皓

東園公綺里季夏黃公角里先生

高帝不能致及將廢太

子太子迎四人至侍從太子鬚眉皓白衣冠甚偉高帝
既見曰煩公幸卒護太子太子由是不廢至孝武帝又
為太子立博望苑使通賓客晉元康元年愍懷太子始
之東宮惠帝詔曰通幼蒙今出止東宮雖賴師傅群賢
之訓其遊處左右宜得正人能相長益者太保衛瓘司
空隴西王泰太子太傅楊濟太子少師裴楷太子少傅

華廡各道義之門有不肅之訓其令五人更往來與太子習數備賓友也其時雖非官而謂之東宮賓客皆選文義之士以侍儲皇其後無聞唐顯慶元年正月以太子太傅兼侍中韓瑗中書令來濟禮部尚書許敬宗左僕射兼太子少師于志寧並為皇太子賓客遂為官員定置四人掌調護侍從規諫凡太子有賓客之事則為上齒蓋取象於四皓焉資位閑重其流不雜

天寶中賀知章自太

子賓客度為道士還鄉捨宅為觀元宗賦詩贈別時議榮之

宋至道元年建儲乃置賓客二人以他官兼天禧四年
參政任中正樞副錢惟演參政王曾並兼太子賓客執
政兼東宮官自此始中興後賓客罕除開禧三年景憲
太子立始以執政兼賓客後復省

太子詹事

少詹

丞

主簿

司直

詹事秦官

應劭曰詹省也給也

漢因之掌皇后太子家

皇后太子各置詹事

隨其所在以名官漢官曰詹事位長秋上亦宦者主中
諸官後漢志曰初成帝鴻嘉三年省詹事職并大長秋
是後皇后當法駕出則中謁中宦者職吏權兼詹事奉
引訖罷宦者誅後尚書選兼職吏一人奉引此皆皇后

也。唐事。漢時太子門大夫庶子洗馬舍人皆屬二傅其太

子家令丞率更令丞僕中盾衛率等官並屬唐事後漢
省唐事而太子官悉屬少傅魏復置唐事領東宮衆務
晉不置至咸寧元年復置以掌宮事

事具六
傅篇

及永康中

復不置自太安以來又置終孝懷之代其職擬尚書令

掌三令四率中庶子庶子洗馬舍人等官銀印青綬介

幘進賢兩梁冠絳朝服佩水蒼玉宋與晉同齊置府領

官屬

齊沈文季為
太子唐事

梁陳任總官朝後魏有太子左右唐

事北齊東宮衆事無大小皆統之領三寺二坊及左右
衛後周置太子宫正宮尹隋開皇初置詹事二年罷之
唐復置詹事府詹事一人掌內外衆務糾彈非違總判
府事置少詹事一人以貳之龍朔二年改詹事為端尹
詹事府為
端尹府 少詹事為少尹咸亨初復舊垂拱元年又改
詹事為宮尹少詹事為少尹神龍初復舊

丞秦官漢因之後漢省魏晉隋詹事省置至晉永康中
詹事特置丞一人掌文書關通六傳過江多用員外郎

遷尚書郎宋齊因之梁陳制一梁冠皐朝服銅印墨綬

後魏北齊並有之

後魏楊昱字元畧為唐事丞孝明為太子尚在懷抱其所出入唯乳母而

已不令官僚聞知昱諫曰太子動止宜令翼從陛下若召太子必降手勅令臣下咸知乃詔曰自此已後非朕手勅勿令兒出宮宮臣在直從至萬歲門隋初置一人唐置二人掌文武官

簿帳朝集假使

分判府事

主簿一人晉始置自後歷代皆有唐因之掌府事勾稽

監印紙筆

司直二人唐龍朔三年置桂坊比御史臺置令一人比

大夫司直二人比侍御史掌彈劾官府察其後廢桂坊以司直隸詹事府

宋東宮官有詹事仁宗陞儲置詹事二人神宗欽宗陞儲並置二人皆以他官兼登位後省乾道元年莊文太子立置詹事二人踰月詔太子詹事遇東宮講讀日並往陪侍七年光宗正儲位以敷文閣直學士王十朋敷文閣待制陳良翰為太子詹事不兼他官非常制也

太子庶子

中允

司議郎

中舍人

舍人

通

事舍人

諭德

贊善

崇文館學士

洗馬

文學

校書

正字

典膳

藥藏

內直

典設

官門

等郎

古者天子有庶子之官

周官謂之諸子

職諸侯卿大夫之庶子

掌其戒令與其教理有大事則帥國子而致於太子惟

所用之秦因之置中庶子庶子員

宋志云後漢置中庶子按齊人鄒陽上疏

云秦皇帝任中庶子蒙嘉之言而匕首竊發則秦官明矣

漢因之有庶子員五人史

丹王商歐陽地餘並為中庶子

王莽改曰中尚翼子

後漢員五人

職如侍中而庶子無員職如三署中郎凡庶子主宮中

并諸吏之適子及支庶版籍魏因之在吳為親近之官

晉中庶子庶子各四員職比散騎常侍及中書監令皆

以俊茂者為之或以郡守參選

鄭默為中庶子朝廷以為太子官屬宜稱陪臣

默上言皇太子體皇極之尊無私於天下宮臣皆受命天朝不得同之藩國事遂施行又王珣啟以桓謙為中庶子曰東宮之選中庶子總管門下尤不可不得其才若釋奠中庶子扶左庶子

扶右宋與晉同武冠平巾幘絳朝服元嘉初詔二率中

庶子隨太子入直上宮十四年又詔還直東宮至齊其

庶子用人卑雜梁天監七年詔革選其年以太子中舍

人司徒從事中郎為之凡中庶子四人以功高者一人

為祭酒行則負璽前後部護駕與功高中舍人一人共

掌其坊之禁令庶子四人掌侍從左右獻納得失與功

高通事舍人一人共掌其坊之禁令冠服並同前代陳

因梁制後魏亦有中庶子庶子官北齊門下坊中庶子

四人領之典書坊庶子四人領之隋分為左右庶子各

二人分統門下典書二坊事唐亦各二人分掌左右春

坊事龍朔二年改左右庶子為左右中護咸亨初復舊

左擬侍中右擬中書令

貞觀中詔曰皇太子與百官書疏未有制式近代以來例皆名

目無以別貴賤今凡處分論事之書皇太子並宜稱令
右庶子以下署名宣奉行書其餘與諸親及師傅等書
不在此限
中允司議郎司經洗馬文學校書正字典膳藥藏

內直典設宮門等局郎丞崇文館並屬右春坊中舍人
舍人通事舍人並屬左春坊諭德贊善亦左右分隸

中允後漢太子官屬有之職在中庶子下洗馬上漢制
太子五日一朝其非朝日即使僕及中允朝朝請問起
居其後無聞宋齊有中舍人是其職也唐貞觀初改太
子中舍人為中允置二員其後復置中舍人龍朔二年

又改中允為左贊善大夫咸亨元年復為中允而左贊善仍置焉中允掌侍從禮儀駁正啟奏并監藥及通判坊局事若庶子闕則監封題職擬黃門侍郎永徽三年以皇太子諱忠改為內允太子遜位而官復舊

司議郎唐貞觀五年皇太子上表請置史職用司箴誡乃於門下坊置太子司議郎四人精選名士以居之龍朔中分為左右以左司議郎替司議郎以右司議郎替舍人咸亨初復舊掌侍從規諫駁正啟奏并錄東宮記

注分判坊事職擬給事中

中舍人晉咸寧初置中舍人四人以舍人才學之美者為之與中庶子共掌文翰在中庶子下洗馬上

晉陸雲為中舍

人凡奏事文書皆綜典之監和嘗藥月檢奏直臣名更

直五日典文疏如中書郎宋亦四人齊有一人梁時功高者一人與中庶子祭酒共掌其坊之禁令陳因之後魏北齊並有之隋曰內舍人四員屬門下坊煬帝減二人唐中舍人二員掌侍從令書奏疏通判坊事擬中書

侍郎永徽三年以皇太子諱忠改為內舍人太子遜位

而官復舊或謂之太子中書舍人

孝和實錄曰王友真太子中書舍人

舍人秦官也漢因之比郎中選良家子孫

晁錯鄭當時並為太子舍

人後漢無員更直宿衛如三署郎中凡帝初即位未有

太子太子宫屬皆罷唯舍人不省屬少府魏因之晉有

十六人職比散騎中書侍郎從駕則正直從次直守妃

出則次直從宋有四人齊有一人梁有十六人掌文記

陳因梁制後魏亦有之北齊典書坊置二十人隋典書

坊有八人煬帝改為管記舍人減四員唐復為太子舍人四人掌侍從表啟宣行令旨分判坊事龍朔二年改為右司議郎咸亨元年復舊

通事舍人齊中庶子屬官有通事守舍人庶子下有內典書通事舍人二人掌宣傳令旨內外啟奏梁亦有之視南臺御史多以餘官兼職陳因之北齊門下坊有通事舍人八人至隋亦有之煬帝改為宣令舍人八員唐復為通事舍人亦有八員掌引導辭見承旨勞問

左右諭德龍朔三年初置太子左右諭德各一員掌侍
從贊諭職比常侍

左右贊善大夫龍朔二年置左贊善大夫替中允置右
贊善大夫替中舍人咸亨元年中允舍人復舊而贊善
大夫別自為官左右各五人掌侍從翊贊比諫議大夫
崇文館學士魏文帝始置崇文觀以王肅為祭酒其後
無聞貞觀中置崇賢館有學士直學士員掌經籍圖書
教授諸王屬左春坊龍朔二年改司經局為桂坊管崇

賢館而罷隸右春坊兼置文學四員司直二員司直正
七品上職為東宮之憲司府門北向以象御史臺也其
後省桂坊而崇賢又屬左春坊後沛王賢為皇太子避
其名改為崇文館其學士例與弘文館同

洗馬秦官漢亦曰先馬

如淳曰前驅也國語曰勾踐親為夫差先馬先或作洗

後

漢員十六人職如謁者太子出則當直者前驅導威儀
也

漢選郎中補

安帝時太子謁廟洗馬高山冠非乘從時著

小冠魏因之晉有八人職如謁者准祕書郎進賢一梁

冠黑介幘絳朝服掌圖籍釋奠講經則掌其事餘與後漢同宋與晉同齊置一人梁有典經局又置八人掌文翰尤為清選皆取甲族有才名者為之位視通直郎陳因之北齊典經坊洗馬二人隋曰司經局置洗馬四人煬帝減二人唐司經局洗馬二人龍朔二年改洗馬為司經大夫三年改司經局為桂坊

一云析司經局置桂坊

司經大

夫通判坊事罷隸左春坊咸亨初復舊掌侍奉及經史

圖籍判局事

文學漢時郡及王國並有文學而東宮無聞魏武置太子文學自後並無至後周建德三年太子文學十人後省龍朔三年置太子文學四員屬桂坊桂坊廢而屬司經開元中定制為三員掌侍奉分掌四部書判書坊事校書宋孝建中洗馬有校書吏四人自後無聞北齊有太子校書隋太子校書有六人唐四人掌讎校經籍正字隋太子正字二員煬帝改為正書唐復為正字亦置二人掌刊正文字

典膳郎漢魏以來並有太子食官局至北齊門下坊始
別置典膳局有監丞各二人隋如北齊之制唐典膳局
有郎二人丞二人郎掌進膳嘗食之事丞貳之
乾封元年皇太子久在內不出典膳丞邢文偉請減膳其年右史闕宰臣進擬數人高宗曰邢文偉嫌我兒不讀書不肯與肉喫此人甚直可用遂拜焉

藥藏郎北齊門下坊領藥藏局有監丞各二人侍藥四
人隋如北齊之制唐藥藏局有郎二人丞二人郎掌和
劑醫藥之事丞貳之

內直郎齊有太子內直兵局內直兵史二人梁有直內主璽主衣扶持等局各置有司以丞其事陳因之北齊門下坊領殿內局有內直監二人副監四人隋如北齊制唐內直局有郎二人丞二人掌符璽織扇几案衣服之事丞貳之

典設郎南齊置居局齋庫丞一人梁齋內局各置有司以丞其事陳因之北齊門下坊有齋師局有太子齋師內閣師各二人隋如北齊制唐典設局有郎四人掌凡

大祭祀湯沐洒掃鋪陳之事

宮門郎秦有太子門大夫漢因之員二人

漢官儀曰門大夫選四府

掾職比郎將

漢官儀曰安帝時太子謂廟門大夫乘從冠兩梁冠

魏因之晉太子

門大夫准公車令掌通牋表及宮門禁防宋因之梁代視謁者僕射陳因之北齊謂之門大夫坊并統伶官隋煬帝改門大夫為宮門監唐初為宮門大夫其門宮局有監郎二人丞二人郎掌東宮殿門管鑰及啟閉之事丞貳之

宋制東宮官有左右庶子諭德舊不常設每儲闈之建
隨宜制官以備寮窠多以他官兼領仁宗神宗陞儲庶
子諭德各置二人欽宗陞儲置一人乾道中庶子諭德
除左不除右七年詔庶子諭德輪日入宮仍同供職事
太子侍讀侍講唐太宗為秦王府有侍講及為太子
亦置焉其後或置或否開元初十王宅引辭學士書者
入教亦命名為侍讀而初不設侍講之官至宋神宗陞
儲時始定制置侍講侍讀各一人中舍人舍人至道

天禧建儲各置一人神宗欽宗登儲皆置中興後省嘉
泰初始除王元實後以館職任伯起兼之慶元令太子
舍人與中舍人皆從七品而中舍人又在舍人上然故
事未嘗除 資善堂大中祥符八年仁宗肄學始置至

紹興五年孝宗以建國公就傅就禁中置學館建資善
堂以范冲朱震為翊善舊制有翊善贊讀直講中興以
後增置說書小學教授開禧初皇子初封榮王命程少
逸趙子中領贊讀不稱王府而以資善繫銜蓋以未出

閭之故

乾道七年禮部太常寺言討論東宮開講并節朔賀慶辭謝禮儀宮僚講讀無已行故事當依倣講筵稍殺其禮每遇講讀詹事以下至講讀官上堂並用賓禮參見依官職序坐皇太子正席講讀官迭起如延英儀講罷復位節朔不受宮僚參賀元日冬至詹事以下賤賀謝辭初以常見之禮後離位致辭復位就坐茶湯罷詹事初上參見皇太子拜皇太子答拜庶

子等初上參見皇太子拜皇太子受拜庶子諭德及講讀官雖有坐受之禮止是五禮新儀所載兼日遂致拜之禮近例皆已不行或遇合致拜日更不參酌天禧至道故事施行並從之

按天禧二年左庶子張士遜等言臣等日請資

善堂參見皇太子雖令升階列拜然後跪受望令皇太子坐受參見詔不許至道元年皇太子每見賓客必先拜迎送常降階及門

太子家令

丞署

主簿

食官署

典倉署

司藏

家令秦官屬詹事

服虔曰太子稱家故曰家令

漢因之有丞主倉穀

飲食職似司農少府漢代太子食湯沐邑十縣家令主
之後漢則屬少傅主倉穀飲食魏因之晉又兼主刑獄
穀貨飲食職比廷尉司農少府其家令率更令及僕為
太子三卿太康八年進品與中庶子二率同自漢至晉
家令在率更下宋則居上銅印墨綬進賢兩梁冠絳朝
服主內茵褥牀几諸供中之物及官奴婢月用錢庫內
鹽米車牛刑獄齊因之自宋齊以來清流者不為之至
梁天監六年武帝以三卿陵替乃詔革選家令視常侍

黃門陳因之後魏亦曰三卿北齊家令有功曹主簿領
食官典倉司藏等三署及領內防令丞隋掌刑法食膳
倉庫奴婢等煬帝改為司府令唐復為家令寺置家令
一人唯主刑法餘與隋同龍朔二年改家令寺為宮
府寺家令為官府大夫咸亨初復舊丞二人主簿一人
領食官署典倉署司藏署署令各一人丞各二人
丞漢家令有丞後無聞宋書云家令丞一人晉置宋齊
以後並有之後周無隋家令丞二人唐因之龍朔二年

改為官府丞咸亨元年復舊掌判寺事

主簿晉家令有主簿宋齊因之自後無北齊家令有主簿員隋亦然唐因之掌印并及勾舉

食官署令丞漢唐事屬官有食官令長丞後漢亦有而屬少傅主飲食晉太子食官令職如太官令宋則屬中庶子齊則屬詹事掌厨膳之事梁食官局屬庶子陳因之後魏亦有北齊有食官令丞又別領器局酒局二丞隋家令寺統食官令丞令一人丞二人唐因之掌飲膳

之事

典倉署令後漢太子倉令屬少傅主倉穀魏以下無聞
後魏有之北齊家令寺領典倉署令丞典倉署又別領
園丞隋家令寺統典倉令丞令一人丞二人唐因之掌
穀藏出納及醢醢庶羞之事

司藏署令晉家令有主物吏四人梁有錫賜庫局丞庶
子又有東宮衛庫丞北齊家令寺領司藏署令丞司藏
又別領仗庫興作二局丞隋家令統司藏署令一人丞

二人唐因之掌藏庫財貨營繕之事

宋有主管左右春坊事二人

以內
臣兼

同主管左右春坊事

二人

以武
臣兼

承受官一人

以內
侍兼

仁宗神宗陞儲位並有之

中興後孝宗光宗正儲位及莊文景獻太子皆置其官

太子率更令

丞

主簿

率更令秦官

顏師古曰掌知
漏刻故曰率更

漢因之有丞主簿庶子舍

人更直職似光祿勳而屬詹事後漢因之後屬少傅魏

因之晉主宮殿門戶及賞罰事職如光祿勳衛尉而屬

唐事宋制銅印墨綬進賢兩梁冠絳朝服梁陳後魏並有之北齊領中盾署掌周衛禁防漏刻鍾鼓亦屬唐事隋掌伎樂漏刻有令丞錄事各一人唐因之加掌皇族次序及刑法事龍朔二年改率更寺為司更寺改令為大夫咸亨初復舊丞主簿各一人

丞後漢率更置丞一人歷代悉有唯後周無唐因隋掌判禮樂刑罰之事

主簿晉置一人宋無齊有之自後無聞北齊隋又有之

唐因之掌印及勾舉

太子僕

丞

主簿

廐牧署

僕秦官漢因之又有長丞主車馬

又有太子廐長一人亦主車馬

後漢

因之而屬少傅職如太僕太子五日一朝其非太子朝

日即與中允入問起居魏因之晉主輿馬兼主親族如

太僕宗正從駕乘安車次家令而屬詹事宋齊並有之

梁視黃門郎陳因之後魏亦有北齊詹事領僕寺置令

丞功曹主簿領廐牧署令隋僕寺置僕一人掌皇族親

踈車輿騎乘領廐牧署令唐因之加掌儀仗喪葬而不
掌親族龍朔二年改僕寺為馭僕寺改僕為大夫咸亨
初復舊丞主簿各一人統廐牧署

丞梁有之陳因之後魏北齊隋並有之唐因之

主簿晉置宋無齊有之梁陳後魏無北齊隋皆有之唐
因之

廐牧署令丞漢有太子廐長丞屬詹事後漢亦有而屬
少傅主車馬魏晉因之齊東宮屬有內廐局外廐局皆

有丞梁陳因之後魏有之北齊則曰廐牧署令丞車輿局丞隋僕寺統廐牧署令丞唐因之掌車馬閑廐牧畜之事

左右衛率府

副率

長史以下官屬

衛率府秦官漢因之屬詹事後漢主門衛徼循衛士而屬少傅魏因之晉武帝建東宮置衛率初曰中衛率太始五年分為左右衛率各領一軍惠帝時愍懷太子在東宮又加前後二衛宿

晉志曰凡太子出前衛率導在前黃麾左右二率從使導輿車

後衛率從在烏皮外並帶戟執刀其服並視左右衛將軍劉卞為愍懷太子左率知貢后必害太子乃謂張華曰東宮雋义如林四率精兵萬人公居阿衡之任若得公命皇太子因朝使錄尚書事廢貢后於金墉兩黃門力耳華不從

成都王穎為太弟又置中衛率是為五率及江左省前後率孝武太元中又置宋齊止署左右二率梁二率視御史中丞銅印墨綬武冠絳朝服左率領七營右率領四營陳有二率後魏曰左右衛率北齊謂之左右衛率坊後周東宮有司戎司武司衛等員隋曰左右率兼有副率二人煬帝改左右衛率為左右侍率兼置

副率二人唐為左右衛率府龍朔二年改其府為左右
典戎衛咸亨元年復舊置率各一人領兵宿衛督攝隊
伍總判府事

李靖為中書令行左
衛率轉兵部尚書

副率二人

掌貳
率事

長史各一人隋置唐因之掌通判自長史以下胄曹以
上諸率府並同

錄事參軍各一人隋置唐因之掌勾稽監印

倉曹參軍各一人隋置唐因之掌官員假使儀式糧廩
膳羞田園公廨遇所監藥等事

兵曹參軍各一人隋置唐因之掌府內衛士以上名帳
差科及公私馬驢等

胄曹參軍各一人隋置為鎧曹唐長安中改為胄曹參
軍神龍初復為鎧曹太極中復為胄曹掌軍器儀仗公
廨營造罪罰長吏以下官局所領職務諸率府並同
親府勳府翊府中郎將各一人梁左右衛率共領十一
營一率各領殿中將軍十人員外將軍十人北齊左右
衛坊率各領騎官備身員外又有內直備身正副都督

隋左右衛率下直閤四人直寢八人直齋直後各十人
唐則曰親勲翊三府各置中郎將左右郎將各一人唐
置錄事兵曹參軍各一人

宋制左右衛司禦清道監門內率府率率府副率不常
置中興後惟監門率府副率為環衛階官

左右司禦率府

隋文帝置左右宗衛官制如左右衛各掌以皇族侍衛
煬帝改左右武侍率唐為左右宗衛率府龍朔二年改

為左右司禦衛後改衛為率府神龍初復為宗衛景雲二年復為司禦率府置率各一人掌與左右衛率同

副率

以下職亦同他准此

副率二人長史錄事及倉兵曹參軍各一人

左右清道率府

隋有左右虞候各置開府一人掌斥候伺姦非長史以下如左右衛煬帝改開府為左右虞候并置副率二人唐為左右虞候率府職擬左右金吾龍朔二年改為左右清道衛神龍初又為虞候率府開元初為清道率府

各置率一人掌斥堠道路先驅後殿伺察姦非副率二人長史錄事及倉兵曹參軍各一人

宋至道元年東宮置左清道率府副率兼左春坊謁者主贊引真宗登位省仁宗在東宮復以郭承慶夏元亨為之登位復省

左右監門率府

隋左右監門率各置一人掌諸門禁煬帝改為監門將軍唐復為左右監門率擬左右監門龍朔二年改為左

右宗掖衛咸亨初復舊垂拱中改為鶴禁衛神龍初復舊各置率一人掌門禁凡財物出有籍副率二人長史錄事參軍及兵曹二曹參軍各一人

左右內率府

隋置左右率副率各一人掌領備身以上

所領千牛以下與千牛衛

同

禁內侍衛供奉兵仗唐為左右內率府龍朔二年改為左右奉裕衛咸亨初復舊各置率一人掌侍衛左右供奉兵仗副率長史錄事參軍及兵曹各一人千牛各

十六人掌執細刀弓箭宿衛侍從備身各二十八人掌宿衛侍從龍朔二年改太子左右千牛備身為太子左右奉裕尋復舊

太子旅賁中郎將

旅賁中郎將一人職如武賁中郎將宋初置天子有虎賁習武訓也諸侯有旅賁禦災害也唐諸率府初有中郎郎將官永徽元年以太子名忠改諸率府中郎將為旅賁郎將其郎將改為翊軍後或改或省

太孫官屬附

卷六十

唐永淳元年三月立皇孫重昭為皇太孫將置府寮高宗召吏部郎中王方慶問曰前代故事如何方慶進曰臣按周禮有嫡孫漢魏以來皇太子在亦不立太孫晉惠帝永寧元年立愍懷太子第三子襄陽王尚為皇太孫太子官屬即轉為太孫官屬南齊永明十年立文惠太子長子南郡王昭業為皇太孫便居東宮今皇太子在而立太孫旁求載籍未有前例上曰自我作古可乎

對曰五帝不相沿樂苟不失上下之序不虧政理之道亦何事而不可上悅使方慶詳求典故官屬乃奏太孫府置師傅友文學祭酒及長史曹掾主簿管記司錄以下六曹從事等官各加王府一級上後頗以為疑竟不補授而止

朱子語錄曰或問東宮官屬曰唐六典載太子東宮官制甚詳如一小朝廷置詹事以統衆務則猶朝廷之尚書也置左右二春坊以領衆局則猶朝

廷之中書門下省也左右春坊又皆設官又各帥

其屬之意崇文館猶朝廷之館閣贊善大夫猶朝廷之諫議大夫其官職一視朝廷而為之隆殺此等制度猶存今之東宮官屬極苟簡左右春坊舊制選賢德者為之今遂用武弁之小有才者其次惟有講讀數員而已如贊善大夫諸官又但為階官非實有職業神宗以唐六典改官制當時亦有不曾討論者如東宮官屬之不備是也舊嘗入劄

論東宮官制踈畧宜倣舊損益之不報

六院四轄

檢院

周置大司寇南梁武帝天監元年詔於公府置唐天寶九載改理匭使為獻納使後又改知匭使

宋雍熙元年改匭為檢

東延恩曰崇仁南招諫曰思諫西申寃曰申明北通元曰招賢

景德四年改為登聞檢院命樞密直學士張詠判

仍差內品

監門不得開預公事隸諫議大夫掌受文武官及士民章奏表疏

凡言朝政得失公私利害軍期機密陳乞恩賞理雪冤濫及奇方異術皆受以通達凡進狀者先鼓院若為所

抑則詣檢院

外有理檢院使今不置始於淳化三年置理檢院於乾元門西北廊以知制誥錢若

水領之復唐制也至道三年廢天聖七年上因讀唐史見匭函達下民冤枉之事乃置匭函仍專命御史中丞為理檢院使以分記中興之初因舊制置局於闕門之前

舊左宣德門外

伏隸門下省

建炎三年專隸諫院南渡以來創治所於和寧

門之下紹興戊寅復承平之制移置居雙闕之左

登聞鼓院

古者朝有誹謗之木敢諫之鼓所以通治道而來諫者也

宋朝曰鼓司以內臣掌之鼓在宣德門南街北廊至道三年命太子中舍王濟勾當鼓司用朝臣勾當自此始景德四年詔改為登聞鼓院掌諸上封而進之以達萬人之情隸司諫正言凡文武臣寮閤門無例通達文字並先經登聞鼓院進狀未經鼓院者檢院不得收接建炎元年因舊制置局於闕門之前

高宗即位於南京召李綱為宰相綱奏曰

今艱難之際四方休戚利害日欲上聞而士民之願効其智慮者尤多而檢院鼓猶未置恐非所以通下情而急先務也三年專隸諫院

進奏院

唐藩鎮皆置邸京師以大將主之謂之上都留後大歷十二年改為上都知進奏院官五代以來支郡不隸藩鎮補人為者聽其置邸隸藩鎮者兼掌焉

宋緣舊制皆本州鎮補人為進奏官其軍監場務轉運司則差知後官則副知掌之逐州就京師各置進奏院

太平興國六年諸州罷知後之名簡知後官得李楚等
百五十人並充進奏官命供奉官張文璨提轄諸道進
奏院監官以京朝官及三班使臣充掌受詔勅及諸司
符牒辨其州府軍監以頒下之并受天下章奏案牘狀
牒以奏御及分授諸司中興以來隸門下後省給事中
點檢訖乾道九年依舊隸後省合傳報事令後省錄付
報行

官誥院

宋初於右掖門置院四司誥身案並集於此以備中書
除改本司郎官各主其事淳化五年始專置官司於省
內凡官誥各以本司誥身印印之文臣用吏部武臣用
兵部王公命婦用封加勲用司勲掌文武官將校誥身
及封贈官誥院提舉一人以知制誥充判院一人以帶
職京朝官充元豐五年行官制文武誥身屬吏部蕃官
誥屬兵部封贈及命婦誥屬司封加勲并將校誥屬司
勲官誥院四部誥身案及吏人隨事隸本部七年并司

封司勲誥身案入吏部預書庫收掌崇寧四年吏部轉
置造官誥局五年罷令尚書右選主管大觀元年復置
尋改為官誥院仍隸左右司三年復罷歸吏部政和三
年六月詔依舊置官誥院差官二員主管少府監鑄印
記吏部製造誥身案記為文中興以來因仍不改

審計院

宋朝以三司使總邦計司各有院以秉中外泉穀出入
之政蓋會計之府也然案牘從委典者不能徧察而姦

容焉淳化三年始用戶部使樊知古奏別其冗籍復別為院置官專領之以聽稍食之要貳置院之初特掌騎兵徒兵給受之數猶未及諸司也元豐三年合步騎兩院為一遂以其一主諸司自宮禁朝廷下至斗食佐史凡賦祿者以式法審其名數而稽其辭受唯郊賜給已乃審祿有疑予則詔以法凡四方之計籍上於大農則逆其會凡有司議調度會賦出則諏焉設員二曰左右廳分案六史八人其名舊為諸軍諸司專勾司建炎元

年避高宗御諱改諸軍諸司審計官

糧料院

宋初仍舊制以三司大將軍為都糧料使自開寶六年以著作佐郎陸光範充改用京官自此始太平興國五年分諸司馬軍步軍為三院八年以馬軍步軍合為一院雍熙四年命供奉官陳處晦勾當諸司糧料供奉官曾祚勾當馬步軍糧料自後復分馬步軍為兩院或以諸司使副分主之端拱二年復以京朝官主之元豐末

并馬步軍與諸司為二院隸太府寺掌以法式頒廩祿
凡文武百官諸司諸軍俸料以券准給中興以來行在
有諸軍諸司糧料院鎮江建康有分差諸軍糧料院鄂
州有分差戶部糧料院四川總所有分差戶部魚關糧
料院分差利州戶部糧料院

權貨務都茶場

權貨務掌折博斛米金帛之屬以朝官諸司使副內侍
二人監太平興國中以先平嶺南及交趾諸國入貢通

開市議於京師置榷易院大中祥符中併入榷貨務建
炎中興又創都茶場給賣茶引隨行在所於榷貨務置
場雖分兩司而提轄監官並通銜管幹建炎四年詔榷
貨務都茶場依
舊隸左右司其提領措置並罷其都
茶場仍令提轄榷貨務官兼行提轄尋徙越州一務場

於建康又併真州一務場歸建康紹興五年詔建康鎮
江兩務場只是給賣鈔引三十二年詔三省今後選差
文臣充監更不差武臣乾道六年詔依舊通差武臣先
是課入不立額唯視舊歲為等差是歲始朥分有定數

歲總為錢二百四十萬萬行都受藏之所為數八十萬萬於建康者一百二十萬萬於鎮江者四十萬萬

雜買雜賣務

宋朝雜買務舊曰市買司太平興國四年改至道中廢咸平復置以京朝及三班內侍三人監掌和市百物凡官禁官物所需以時供納雜賣務景德四年置掌受內外幣餘之物計直以待出貨或準折支用以內侍及三班二人監後亦差文武朝官紹興六年詔雜買務雜賣

場置提轄官一員

文思院

宋朝太平興國三年置掌造金銀犀玉工巧之物金彩
繪素裝鈿之飾以供輿輦冊寶法物及凡器服之用隸
少府監熙寧三年詔文思院兩界監官立定文臣一員
武臣一員朝廷選差其內侍勾當官並罷紹興三年詔
少府監併歸文思院其上下界監官從工部辟差工部
言所轄文思院舊分上下界監官三員內一員文臣係

京朝官上界造作金銀珠玉下界造作銅鐵竹木雜料
欲依舊分為上下界從之隆興二年詔併禮物局入文
思院

左藏庫

掌受四方財賦之入以待邦國之經費其原蓋起於周
職內主賦入職歲主賦出而邦布之入出則外府又主
之皆其職也晉始制左右藏令唐於左右藏分建東西
庫以太府少卿知出納於左長慶門之東

宋初左右止一庫置使領焉太平興國二年分為二庫
淳化三年分置左右藏各二庫四年廢右併入左政和
六年修建新庫以東西庫為名中興因仍東西庫各以
文臣監武臣同監其東幣帛純紬之屬在焉其西金銀
泉券絲纊之屬在焉紹興二十七年詔戶部於轄下丞
簿內選一員兼充左藏庫提轄官此提轄所由始也孝
宗即位詔將御前樁管激賞庫撥歸左藏庫以左藏南
庫為名專一樁管應副軍期支遣於是有東西南三庫

尋罷南庫大抵國家用度多靡於贍軍西蜀湖廣江淮之賦類歸四總領所以餉諸屯其送京者殆無幾唯閩浙悉輸焉東西庫歲入以端計者率百四十萬以緡計者率二十萬給遣稱是而大軍居十之七宮禁百司祿賜纔三之間有非泛浩繁之費則請於朝往往出內帑封樁以補所闕監官凡五人分帑而治舊以京朝官為之今唯才是用故四選通得人

建炎以來朝野雜記曰六院官檢鼓糧審官誥進

奏也例以京官知縣有政績者為之亦有自郡守
除者則繼即除郎如鹿伯可是也故恩數畧視職
事官而不入雜壓紹興十一年胡汝明以料院除
監察御史遂遷副端乾道後相繼入臺者有宋敦
書蕭之敏陳升卿傅淇等數人而六院彌重號為
察官之儲矣淳熙初龔實之東政其內弟林宓幹
辦審計司遇郊恩而林尚京秩乃白上以六院官
班寺監丞之上林用是得封贈父母龔後為謝廓

然所論南竄此其一事也紹興二年夏六院官始復入雜壓在九寺簿之下焉

又曰六院官入雜壓事甲記已具淳熙四年既削去近歲乃復舉行其班在五寺主簿之下太學博士之上六院官通計十二人皆得轉對但不入品耳然六院以為邑有政績者為之故例為察官之選

又曰四提轄謂權貨務都茶場雜買務雜賣場文

思院左藏東西庫是也。權貨務場掌醴茗香礬鈔引之政令。紹興初沿宣政舊例置提領官率以故省吏為之。後乃改用士人行在建康鎮江三務場歲入凡二千四百萬緡。

建康一千二百萬行在八百萬鎮江四百萬

皆

以都司提領不係戶部之經費而在建康鎮江者分屬總領所焉。開禧末以總所侵用儲積錢始徑隸提領官不屬總所買務賣場蓋唐宮市之遺制近制凡宮禁月料朝省紙劄文思院之製造和劑

局之修合皆所取給焉至若斤左幣封樁之幣餘
編估打套則賣場掌之紹興六年始置提轄官總
其事先是四轄官外補則為州內遷則寺監丞簿
亦有徑為雜監司或入三館者乾道八年十二月
權貨王裡除福建
市舶左藏王揖除九路鑄錢淳熙
七年三月熊子復自文思校書郎近歲望稍輕往
往更遷六院官或出為添倅非曩日之比矣

總宮觀

宋朝設祠祿之官以秩老優賢祖宗時員數絕少

官制
舊典

云祖宗待臣以禮雖年及掛冠未嘗
直令致仕皆以宮觀處之假以祿耳
熙寧以後乃增焉

是時方經理時政患疲老不任事者廢職欲悉罷之乃
使任宮觀以食其祿時相王安石亦欲以此處異議者
遂詔宮觀毋限員並差知州人以三十月為任

在京宮觀

宋朝舊制以宰相執政充使或丞郎學士以上充副使
兩省或五品以上為判官內侍官或諸司使副

政和改
武臣官

制以使為大
夫副使為郎
為都監又有提舉提點主管官其戚里近

屬及前宰執留京師者多除宮觀以示優禮之意紹興

二十一年在京宮觀依在外宮祠以三十箇月為任

又紹

興五年詔任在京觀請給人從前宰執依見任減十分之二間學士已上依六曹侍郎直學士已上依中書舍人太中大夫已上依左右司郎中任樞密都承旨間學士已上依天曹尚書直學士已上依六曹侍郎太中大夫已上依中書舍人

宮觀使

唐天寶七載以給事中楊釗充九成宮使宮使之名自

此始

南部新書

宋朝祥符中真宗建玉清昭應宮王魏公旦為首相始命充使宮觀置使自此始又有景靈宮會靈觀使然每為宰相兼職天聖元年呂夷簡為相時朝廷崇奉之意稍緩因請罷使名熙寧中富鄭公弼領集禧觀使居洛此宮觀使居外之所從始也徽宗建玉清萬壽宮乃命宰執兼使副用真廟故事也近以前宰執奉朝請者領在京宮觀使而在外舊相只除提舉宮觀非祖宗優待宰相之體靖康以來猶未釐正蓋朝廷未暇講也政和

八年太師魯國公蔡京少傅太宰鄭居中少保少宰余
深檢校太保領樞密院事童貫並兼充神霄玉清萬壽
宮使知樞密院事鄧洵門下侍郎薛昂中書侍郎白時
中尚書左丞王黼宣和殿大學士蔡攸並兼充副使渡
江後前執政在經筵者不以官高卑率為觀使若他官
則使相已上乃得之其居外者必官至三少乃除淳熙
中崇憲靖王自節度使拜使相封郡王中書進熟擬提
舉洞霄宮周文忠當制引故事宗室使相外居者當得

觀使上批如所請紹熙初趙文定以使相判潼川府乞奉祠乃除醴泉觀使非舊典也開禧末陳勉之以特進罷相不帶職乃亦除觀使蓋章達之侍郎當制失之翊日李季章進呈改提舉洞霄宮合故典矣天禧以前崇觀以後宮觀使之名甚衆渡江以後宮觀不復置而觀使有三前宰相則得醴泉宗戚則得萬壽又其次則得佑神云宣政間又有提點宮觀官在提舉之下主管之上今省

提舉宮觀

宋朝真宗時東西太一宮提舉以兩省兩制丞郎官為之掌奉齋醮之事天聖七年玉清宮災遂罷使而景靈會靈祥源三宮觀以學士舍人管勾李若谷罷參政為資政殿大學士提舉會靈觀自是學士待制知制誥皆得為提舉晏元獻以舊相提舉萬壽觀武臣李端愿止得管勾祥源觀今朝官亦云提舉非故事也

在外宮觀嶽祠

宋朝宮觀皆俟力請而後授侍從而上任宮觀者絕少
若因責降改作主管方且差焉熙寧初王安石相異已
者方直除宮觀大抵宮觀非自陳而朝廷特差者如降
黜之例二年詔杭州洞霄宮亳州明道宮華州雲臺觀
建州武夷觀台州崇道觀成都府玉局觀建昌軍仙都
觀江州太平觀洪州玉隆觀五嶽廟並依嵩山崇福宮
舒州靈仙觀置管勾或提舉提點官四年詔宮觀嶽廟
留官一員餘聽如分司致仕例從便居住六年詔卿監


職司以上提舉餘官管勾當者又詔年六十以上者乃聽差毋過兩任兼用執政恩例者通不得過三任後蔡京用事增廣職任崇寧三年添宮觀十政和三年添宮觀三十

名見續會要
多不錄

選人亦許乞獄廟宣和王黼用事外

開新邊以熙寧法革之一切不恤士夫於是失祿矣

文獻通考卷六十



總校官庶吉士臣張能照

校對官檢討臣郭寅

謄錄監生臣張元信

欽定四庫全書薈要

史部

文獻通考卷六十二

校官員外郎臣潘紹觀



欽定四庫全書會要卷九千三百八十一

史部

文獻通考卷六十一

鄱陽馬端臨貴與著

職官考十五

司隸校尉

司隸周官也掌五隸之法辨其物而掌其政令

五隸謂
罪隸四

翟之隸也物謂
衣服兵器之屬

帥其民而捕盜賊漢武帝征和四年初

置司隸校尉持節從中都官徒千二百人

中都官京
師諸官府捕

巫蠱督大姦猾

督謂察視之

後罷其兵察三輔三河弘農

志晉

曰漢武帝初置十三州刺史各一人又置司隸校尉察三輔三河弘農七郡

元帝初元四年

去節後諸葛豐為司隸又加節尋復去之司隸去節自

豐始也

諸葛豐為司隸無所迴避侍中許章以外屬貴幸賓客犯法與章相連豐欲劾奏適逢章出豐

駐車舉節招章曰下欲收之章馳去豐奔車逐之章遂入殿得免因此成帝遂收豐節

成帝元延

四年省綏和二年哀帝復置但為司隸

除校尉字

冠進賢冠

屬大司空比司直司隸掌察皇太子以下行馬內事皆

主之專道而行專席而坐初除皆謁兩府

兩府謂丞相御史也唯涓

黜初為司隸不肯謁丞相御史大夫後為翟方進奏免
又漢書曰鮑宣字子都明經為司隸丞相孔光行園陵
官屬行馳道中宣使斂止丞相掾史沒入其車馬推辱
宰相又王駿為司隸校尉奏免丞相匡衡又蓋寬饒為
司隸亦無後漢復為司隸校尉所部河南尹河內右扶
所迴避

風左馮翊京兆尹河東弘農凡七郡治河南洛陽

北齊書曰

後漢凡皇族不得典三河
蓋忌其親而惜形跡之地

無所不糾唯不察三公

後漢書曰

上言宜令司隸校尉督察三公陳元
議以為不宜使有司省察公輔乃止

廷議處九卿上朝

賀處公卿下

鮑永為司隸鮑恢為都官從事並不避強
禦詔策曰貴戚且當斂手以避二鮑又中

常侍王甫曹節等用事尚書令陽球常唾手拊髀曰當
令陽球作司隸此輩敢爾及後拜司隸遂表劾王甫自

臨考父子皆死於杖下曹節見甫屍乃收淚入言球罪帝徒為衛尉球叩頭曰願假臣一月必令豺狼鴟鴞悉伏其辜又李膺字元禮拜司隸校尉張讓弟朔為野王令貪殘無道畏膺而逃藏讓舍柱中膺率將吏破柱取朔付獄殺之自是宦官屏氣休沐不敢復出帝問其故並叩頭泣曰畏李司隸凡司隸屬官有從事史十二人其都官從事史至為雄劇主察百官之犯法者魏晉司隸與二漢同

劉聰僭號置左右司隸

司隸於端門

外坐在諸卿上絕席其入殿按本品秩在諸卿下不絕

席初以司隸官屬制置如州儀而俗稱之司州

見太康記及

魏晉乃以京輔所部定名置司州以司隸校尉統之及

東晉渡江罷司隸校尉官變其職為揚州刺史後魏北齊為司州牧後周有司隸下大夫掌五隸及徒者捕盜賊囚執之事屬大司寇隋初有雍州牧後煬帝置司隸臺有大夫一人掌諸巡察薛道衡為司隸大夫別駕二人分察畿內一人按東都一人按京師後又罷司隸臺裴蘊為御史大夫欲重己權令虞世基奏罷司隸刺史以下官屬而留司隸從事之名不為常員臨時還京官清明者權攝以行唐無司隸校尉而有京畿採訪使亦其職也

州牧刺史

黃帝立四監以治萬國唐有九州舜置十二州有牧夏
為九州牧殷周八命曰牧秦置監察御史漢興省之至
惠帝三年又遣御史監三輔郡察詞訟所察之事凡九
條監者二歲更之常以十月奏事十二月還監其後諸
州復置監察御史文帝十三年以御史不奉法下失其
職乃遣丞相史出刺并督察監察御史武帝元封元年
御史止不復監五年乃置部刺史掌奉詔六條察州凡

十二州焉

漢制刺史以六條問事非條所問即不省一條強宗豪右田宅踰制以強凌弱以衆暴寡

二條二千石不奉詔書遵承典制背公向私旁詔守利
侵漁百姓聚斂為姦三條二千石不卹疑獄風厲殺人
怒則任刑喜則任賞煩擾刻暴剝截黎元為百姓所疾
山崩石裂妖祥訛言四條二千石選署不平苟阿所愛
蔽賢寵頑五條二千石子弟恃怙榮勢請託所監六
條二千石違公下比阿附豪強通行貨賂割損正令居

部九歲舉為守相成帝綏和元年以為刺史位下大夫
而臨二千石輕重不相準乃更為州牧秩真二千石位

次九卿九卿缺以高第補

是時何武與翟方進奏曰古選諸侯賢者以為州伯今部

刺史居牧伯之位選第大吏所薦位高至九卿所惡立
退任重職大春秋之義用貴理賤不以卑臨尊刺史位

下大夫而臨二千石輕重不相準請
罷刺史更置州牧以應古制奏可

哀帝建平二年復

為刺史

時朱博又奏曰漢家立置郡縣部刺史奉使典州督察郡國吏人安寧故事居部九歲舉為守

相其有異材功效著者輒登擢秩卑賞厚咸勸功樂進今增秩為牧以高第補九卿其中材則苟自守而已恐功效陵夷姦宄不禁臣請罷牧置刺史如故奏可

元壽二年復為牧後漢光武

建武十八年復為刺史外十二州各一人其一州屬司

隸校尉漢刺史乘傳周行郡國無適所治中興所治有

定處舊常以八月巡行所部

常以秋分行部郡國各遣二吏迎之界上

錄囚

徒考殿最初歲盡詣京都奏事中興但因計吏不復自

詣京師

建武十一年初斷州牧自還奏事

雖父母之喪不得去職

元嘉元年

初聽

刺史二千石行三年服延熹二年復斷之

或謂州府為外臺

謝夷吾為荊州刺史第五

倫薦之

曰尋功簡能為外臺之表聽察聲實為九伯之冠

靈帝中平五年改刺史惟

置牧是時天下方亂豪傑各欲據有州郡而劉焉劉虞

並自九卿出領州牧州牧之任自此重矣舊制州牧奏

二千石長吏不任位者事皆先下三公三公遣掾史按

驗然後黜退光武即位用法明察不復委三府故權歸

舉刺之吏魏晉為刺史任重者為使持節都督輕者為

持節皆銅印墨綬進賢兩梁冠絳朝服領兵者武冠而
晉罷司隸校尉置司州江左則揚州刺史自魏以來庶

姓為州而無將軍者謂之單車刺史

庶姓謂非帝族

凡單車刺

史加督進一品都督進二品不論持節假節晉制刺史

三年一入奏

甲午詔書曰刺史銜命國之外臺其非所部而在境者刺史并糾之

宋與魏

同梁刺史受之明日辭宮廟而行皆持節後魏天錫二
年又制諸州置三刺史皇室一人異姓二人比古之上
中下三士也郡置三太守縣置三令長孝文太和中次

職令自後魏北齊則司州曰牧而北齊制州為上中下

三等每等又有上中下之差自上上州至下下州凡九

等後周則雍州曰牧而制刺史初除奉辭之日備列鹵

簿凡總管刺史則加使持節諸軍事以此為常及蘇綽

為六條之制初文帝秉魏政令百官誦習其牧守令長

非通六條及計帳者不得居官

六條之制其略曰其一先治心心不清淨則思

慮妄生見理不明是以治民之要在於清心而已其二敦教化其三盡地利其四擢賢良其五卹獄訟其六均

賦役靜帝大象元年詔總管刺史及行兵者加持節餘悉

罷之隋雍州置牧餘州並置刺史亦同北齊九等之制

總管刺史加使持節至開皇三年罷郡以州統縣自是

刺史之名存而職廢

後雖有刺史皆太守之互名理一郡而已非舊刺史之職按魏置使

持節寵奉使官之任

隋氏廢郡而以刺史牧人既非使

官則合罷持節之稱

其時制置不以名實相副為意仍

舊存之後改為太守亦復不省所以使持

節之名及於邊遠小郡乃不徵典故之失刺史縣令三

年一遷諸有兵處則刺史帶軍事以統之

煬帝乃別置都尉領兵

不屬郡

十四年改九等州縣為上中下凡三等煬帝大業

初復罷州置郡為司隸臺大夫一人巡察畿內

又有司隸刺史

房彥謙

嘗為之

其刺史十四人巡察畿外諸郡亦有六條之制

與漢六

條不同

從事四十人副刺史巡察每年二月乘軺巡郡

縣十月入奏唐武德元年罷郡置州改太守為刺史而

雍州置牧至神龍二年二月分天下為十道置巡察使

二十人

一道二人

以左右臺及內外官五品以下堅明清勁

者為之兼按郡縣再期而代至景雲二年改置按察使

道各一人開元十年省十七年復置二十二年改置採訪

處置使

其有成旅之地即置節度使仍各置印天寶九載三月勅本置採訪使令舉大綱若大小

必由是一人兼理數郡自今已後採訪使但採察善惡
舉其大綱自餘郡務所有奏請並委郡守不須干及
理於所部之大郡并領都團練使其僚屬隨事增置分
天下為四十餘道大者十餘州小者二三州各因其山
川區域為制諸道增減不恒使名沿革不一舉其職例
則皆古之刺史云

都督

總管節度團練都統等使附

後漢光武建武初征伐四方始權置督軍御史事竟罷
建安中魏武為相始遣大將軍督之而袁紹分沮授所
統諸軍為三都督

紹以沮授郭圖淳于瓊各典一軍

魏武征孫權還又

使夏侯惇督二十六軍魏文帝黃初三年始置都督諸州軍事或領刺史又上軍大將軍曹真都督中外諸軍假黃鉞則總統外內諸軍矣明帝太和四年司馬宣王征蜀加號大都督高貴鄉公正元二年司馬文王都督中外諸軍尋加大都督晉受魏禪則都督諸軍為上監諸軍次之督諸軍為下使持節為上持節次之假節為下使持節得殺二千石以下持節殺無官位人若軍事得與使持節同假節唯軍事得殺犯軍令者及伐吳之

役以賈充為使持節假黃鉞大都督總統六師

兼給羽葆鼓吹

緹幢兵萬人騎二千置左右長史司馬從事中郎增參軍騎司馬各十人帳下司馬二十人大車官騎各三十

人太康中都督知軍事刺史理人各用人也惠帝末乃

并任非要州則單為刺史

庾翼都督征討諸軍事鎮襄陽綏懷招納立客館置典賓

參軍江左以來都督中外尤重惟王道等權重者乃居之

宋氏人臣則無居者惟江夏王義恭得假黃鉞假黃鉞則專戮節制非人臣常器又有都督諸州諸軍事者則為常職舊曰監某州諸軍事文帝即位改監為都督後

魏有都督中外諸軍事永安以後近遠多事置京畿大

都督總攝軍人立府置佐後周改都督諸軍事為總管

則總管為都督之任矣又有大都督帥都督都督至隋

三都督並以為散官煬帝改大都督為校尉帥都督為

旅帥都督為隊正

唐武德七年改上大都督為驍騎尉大都督為飛騎尉帥都督為雲騎尉

都督為武騎尉

按此則都督之名微矣隋文帝以并益荆揚四

州置大總管

并益揚三州以親王臨統唯荆州以韋世康為之時論以為美

其餘總管

府置於諸州列為上中下三等加使持節煬帝悉罷之

唐諸州復有總管亦加號使持節刺史加號持節武德

元年諸州總管亦加號使持節五年以洛荆并幽交五

州為大總管府七年改大總管府為大都督府總管府

為都督府

舊洛州已置都督府武德四年廢府置大行臺

復有行軍大總管者

蓋有征伐則置於所征之道以督軍事武德以來亦有

元帥之號太宗為秦王加西討元帥中宗為周王為洮

河道元帥睿宗為相王為并州道行軍元帥

安祿山反後天寶十

五載哥舒翰為諸道兵馬元帥其後李光弼郭子儀復為副元帥李岷李若幽李勉又為兵馬都統蓋從其宜

也 太極初以并益荆揚為四大都督府開元十七年加

潞州為五馬其餘都督定為上中下等

上都督府五中都督府十三下

都督府

前後制置改易不恒難可備叙凡大都督府置

十六

大都督一人

掌所管都督諸州城隍兵馬甲仗食糧鎮戍等

親王為之多遙領

其任亦多為贈官長史居府以總其事

各有長史司馬錄事功曹以下

官屬因員數多少與諸州府有差其職事不異具郡佐篇

分天下州縣制為諸道每

道置使理於所部

即採訪防禦等使也

其邊方有寇戎之地則加

以旌節謂之節度使自景雲二年四月始以賀拔延嗣

為涼州都督充河西節度使其後諸道因同此號得以
軍事專殺行則建節府樹六纛外任之重莫比焉本皆
兼度支營田使開元九年十一月勅其河東河北不須
別置並令節度使兼充有副使一人副貳使行軍司馬一

人申習法令自漢魏至隋總戎出征則刺史都督將軍
等官置長史司馬諸曹參軍為之寮佐按官置司唐
本制大總管乃前代專征之任其寮佐亦多同之自後
改為節度大使署副使判官以為寮佐如前代長史已
下之任然長史司馬及諸曹是曰官名副大使副使判
官乃為使職有所改易合隨府主置大使則有副使已
下今若改名使府不合設官充其寮吏蓋因授任者莫
詳其源既有副使又置司馬參雜重設遂為其例況不

標於甲令固須區別著定恒規也

判官二人

分判倉兵騎曹四曹事副使及行軍司馬通署

掌

書記一人

掌表奏書檄齊書曰宋江夏王義恭取丘巨源為掌書記

參謀無員

或一人或

二人參議謀畫隨軍四人

分使出入

開元中凡八節度使

磧西河西隴右朔方

河東幽州劍南嶺南此八節度也後更增加兼改名號

蓋古之持節都督江左四

中郎將近代行軍總管之任

凡將帥出行兵滿萬人以上則置長史司馬倉兵等

曹參軍若萬人以下員數遞減自至德以來天下多難諸道皆聚兵增節度使為二十餘道其非節度使者謂之防禦使以採訪使并領之採訪理州縣防禦理軍事初節度與採訪各置一人天寶中始一人兼領之乾元中始置都統使監總管諸道或領三道或領五道皆古方岳牧伯之任也上元末省都統後又改防禦使為都

團練守捉使皆主兵事而無旌節察屬亦減有副使一人掌貳使事判官二人分判軍事自永泰以來都團練使稍有加置參謀者若朝覲則置留後擇其人而任之宋武帝起義討桓玄既平京口向建業以孟昶為長史總攝後事及討司馬休之伐荊州以中軍將軍劉道鄰監留府事皆留後之任也自後無代無之不復遍舉

都護

漢宣帝地節二年初置西域都護為加官也或以騎都尉諫議大夫使護西域三十六國有副校尉始以鄭吉為之後廢至後漢永平十七年復置

班超為西域都護大破焉耆尉犂斬

其王自是西域降伏

納質者五十餘國

晉宋以後有都護之官亦其任也

齊書曰廣州西南有二江川源深遠別置督護專

征討之任陳伯超為西江都護沈顗為南江都護唐永

徽中始於邊方置安東安西安南安北四大都護府後

又加單于北庭都護府麟德元年改雲中都護為單于都護府置都護一

人掌所統諸蕃慰撫征討斥埃安輯蕃副都護二人掌

都護事其安北長史司馬各一人錄事功曹倉曹戶曹

單于則置一人其安北單于唯有人參軍事三人其安北單于唯有

司馬倉曹兵曹各一人餘並不置

觀風俗使

唐貞觀八年分遣蕭瑀李靖楊恭仁王珪竇靜李大亮
劉德威皇甫無逸韋挺李襲譽張亮杜正倫趙智等巡
省天下延問疾苦觀風俗之得失察政刑之苛弊以後
不復置

巡察按察巡撫等使

貞觀二十年遣大理卿孫伏伽等二十一人以六條巡
察四方多所舉刺太宗命褚遂良一其類以聞乃親自
臨決牧宰以下以能官進擢者二十人罪死者七人流

罪以下免黜數百人天授二年發十道存撫使以右肅
政御史中丞知大夫事李嗣真等為之

時分巡天下者
皆左右臺官

神龍二年勅左右臺內外五品已上官識理通明無屈
撓者二十人分為十道巡察使二周年一替以廉按州
郡景龍二年置十道按察使分察天下至開元八年五
月復置十道按察使以陸象先王皎等為之正元八年
以江淮荆襄陳宋河朔水災遣中書舍人奚陟左庶子
姚齊語祕書少監雷成京兆少尹韋武為諸道宣撫使

賑給災荒均平賦役疎決囚繫懲肅官吏元和四年以旱災復遣左司郎中鄭敬等為諸道宣撫使

黜陟使

貞觀八年發十八道黜陟大使二十年遣大理卿孫伏伽等以六條巡察四方黜陟官吏開元二十一年遣使以崔翹等為之天寶五載遣使以席豫等為之至德二載遣使以號王等為之建中元年以庾何等為之自建中以後省

採訪處置使

開元二十二年初置十道採訪處置使以御史中丞盧
絢等為之仍置印二十五年命諸道採訪使考課官人
善績三年一奏永為常式天寶九載勅採訪使但察訪
善惡舉其大綱自餘郡務所有奏請並委郡守不須干
及乾元元年詔近緣狂寇亂常每道分置節度其管內
緣徵遣及文牒兼使命來往州縣應命非不艱辛仍加
採訪轉益煩擾其採訪使置來日久并諸道黜陟使宜

且停待後當有處分

其年改為觀察處置使

容齋洪氏隨筆曰唐世於諸道置按察使後改為採訪處置使治於所部之大郡既又改為觀察其有戎旅之地即置節度使分天下為四十餘道大者十餘州小者二三州但令訪察善惡舉其大綱然兵甲財賦民俗之事無所不領謂之都府權勢不勝其重能生殺人或專私其所領州而虐視支郡元結為道州刺史作春陵行以為諸使誅求符

牒二百餘通又作賊退示官吏一篇以為忍苦哀
斂陽城守道州賦稅不時觀察使數誚責又遣判
官督賦城自囚於獄判官去復遣官來按舉韓愈
送許郢州序云為刺史者恒私於其民不以實應
乎府為觀察使者常急於其賦不以情信乎州財
已竭而斂不休人已窮而賦愈急韓皋為浙西觀
察使封杖決安吉令孫澥至死一時所行大抵類
此然每道不過一使臨之耳今之州郡按控制刺

者率五六人而臺省不預毀譽善否隨其意好又非唐時一觀察使比也

按野處所言以為唐之州縣不過一使臨之而宋則有帥漕憲倉四司故州縣之官尤難以奉承展布蓋唐制一道兵政屬之節度使民事屬之觀察使然節度多兼觀察又各道雖有度支營田招討經畧等使然亦多以節度使兼之蓋使名雖多而主其事者每道一人而已至宋則監司各自有建

臺之所每司專有長官專有掾佐而號令之行於
統屬者始煩矣然宋之監司雖多而一司猶不過
一人專之也若夫司存鼎立而每司之稱牧伯刺
史者比肩數人而以臨乎其郡每郡則稱守者比
肩數人而以臨乎其縣每縣則稱宰者比肩數人
而以臨乎其民則其誅求之苛密奉承之不易易
又振古所無也

度支營田使

開元十年勅度支營田若一使專知宜同為一額共置判官兩人元和十三年詔曰事關軍旅並屬節制務係州縣悉歸廉察二使所領實曰管轄諸道度支營田承前各置使自艱虞以後名制因循方鎮除授之時或有兼帶此職遂令綱目所在各殊今日務修舊章思一法度去煩就理衆心為宜唯別置營田處其使且令仍舊其忠武鳳翔武寧魏博山南東道橫海邠寧義成河陽等道度支營田使及淮南度支近已停省其餘諸道並

準此處分初景雲開元間節度度支營田等使諸道並不置又一人兼領者甚少艱難以來優寵節將天下擁旄者常不下三十人例銜節度度支營田觀察四使其邊界藩鎮增置名額者又不一前後六十餘年雖嘗增減官員及使額而度支營田以兩河諸將兼領故朝廷不議停廢至是羣盜漸息宰臣等奏罷之

租庸使

開元十一年宇文融除殿中侍御史勾當租庸地稅使

天寶二年陝郡太守韋堅兼知勾當租庸使六載楊國忠加諸郡租庸使至德元載第五琦除監察御史充江淮租庸使廣德元年考功郎中裴諝為河東道租庸鹽鐵等使永泰元年京兆尹第五琦奏租庸使請一切並停唯差判官一人巡官二人催遣從之

兩稅使

建中三年初分置汴東西水陸運兩稅鹽鐵使

包估催縱分為

之八年以東都河南江淮嶺南山南東道兩稅等錢物

令戶部侍郎轉運使張滂主之東渭橋以東諸道巡院
並隸滂以關輔河東劔南山南西道財物令戶部尚書
度支使班宏主之其後宏滂互有短長宰相趙憬陸贄
具以其事上聞由是參用大歷故事如劉晏韓滉所分
焉元和四年制令鹽鐵使楊子留後宜兼充淮南浙西
東宣歙福建等道兩稅使其江陵留後宜兼充荆南山
南東道鄂岳江西湖南嶺南等道兩稅使度支山南西
道分巡院官宜兼充劔南東西川山南西道兩稅使其

硃內五監舊屬鹽鐵使宜割屬度支使便委山南西道
兩稅使兼知糴貨各奉所職期於悉心

戶口使

開元十二年宇文融除御史中丞充諸色安輯戶口使
天寶四載戶部郎中王鉷加勾當戶口色役使

蘇氏駁曰九寺三監東宮三寺十二衛及京兆河
南府是王者之有司各勤所守以奉職焉尚書省
舊章立程度以頒之御史臺按格令採姦濫以繩

之中書門下立百司之體要察羣吏之能否善績
著而必進敗德聞而且貶政有恒而易守事歸本
而難失經遠之理舍此奚據洎姦臣廣言利以邀
恩多立使以示寵尅下民以厚斂張虛數以獻狀
上心蕩而益奢人望怨而成禍使天子有司守其
位而無其事受厚祿而虛其用宇文融首倡其端
楊奢矜王鉞繼遵其軌楊國忠終成其亂仲尼云
寧有盜臣而無聚斂之臣誠哉是言前車既覆後

轍未改求達化本不亦難乎

洪氏容齋隨筆曰楊國忠為度支郎領十五餘使
至宰相凡領四十餘使第署一字不能盡胥吏因
是恣為姦欺新舊唐史皆不詳載其職按其拜相
制前銜云御史大夫判度支權知太府卿事兼蜀
郡長史劍南節度度支營田等副大使本道兼山
南西道採訪處置使兩京太府司農出納監倉祠
祭木炭宮市長春九成宮等使關內道及京畿採

訪處置使拜右相兼吏部尚書集賢殿崇元館學士修國史太清太微宮使自餘所領又有管當租庸鑄錢等使以是觀之槩可見矣宮市之事咸謂起於德宗貞元不知天寶中已有此名且用宰臣充使也韓文公作順宗實錄但云舊事宮中有要市外物令官吏主之與人為市隨給其直正元末以宦者為使亦不及天寶時已有之也

轉運使

唐先天二年李傑

始名務先

始為水陸發運使蓋使名之起

開元二十一年裴耀卿以侍中充江南淮南轉運使而
崔希逸蕭冕為副蓋副使始此天寶以韋堅充勾當轉
運使第五琦充諸色轉運使劉晏充諸路轉運使其後
韓滉杜棕杜讓能崔昭緯皆以宰相充使而諸道分置
巡院皆統於此五代罷巡院始置轉運使

宋朝藝祖開基懲五季之亂藩臣擅有財賦不歸王府
自乾德以後僭偽略平始置諸道轉運使以總利權開

寶六年廣南平除徐澤為判官蓋轉運判官始此其轉
運使之名國初但曰勾當某路水陸計度轉運事官高
者則曰某路計度轉運使太平興國初皆曰使兩省以
上則為都轉運使又置副使與諸路判官焉又置同勾
當轉運事俄罷諸路副使真宗每用兵或令都部署兼
轉運使王師征討則有隨軍轉運使事畢即停至道中
詔曰天下物宜民間利病惟轉運使得以周知令更互
赴闕延見詢問焉慶歷中皆帶按察之任六年罷之

年三

詔諸路轉運使並兼按察使每歲具官吏能否先是歐陽修請遣使按察官吏賈昌朝言轉運以按察官吏故令兼而領之六年赦書以為所過煩擾吏不能安其職遂並罷之

先是判官與轉運爭

權而罷至嘉祐中復置熙寧二年詔轉運使用本資序人即充資序下一等為權二等為權發遣中興以來逐路都轉運使除授不常惟使副判官常置舊制轉運司除授皆命詞給誥渡江已後例給勅命後稍復舊轉運使副命詞運判則否六年諸路運判亦命詞給誥光宗紹熙以來使副運判不雙除屬官有主管文字一員幹

辦公事人員又有準備差遣員多寡不一

東萊呂氏曰國初未嘗有監司之目其始除轉運使止因軍興專主糧餉至班師即停罷如太祖時平澤潞則命戶部侍郎高防兵部侍郎邊光範充北路轉運使用師湖南則命部判官滕白充南面給事中沈義倫充京西水陸轉運使是也至於命何幼冲充東面劉仁遂充西面曹翰充南面胡玩充北面皆水陸轉運使太宗時如劉保勲為河東

城西四面轉運使樂冲為太原管內水陸轉運使
郭泌為御河至關南水陸轉運使王在田為陸路
轉運使崔邁為水路判官或謂路或謂道或曰知
或曰同或曰同知或為幹當皆緣用武責以餽運
之職也太祖開寶五年命二參政事薛居正呂餘
慶兼領提舉諸州水陸轉運使明年薛居正沈義
倫拜相呂餘慶去位遂以居正義倫二相兼提舉
水陸漕事累朝以武臣為帥守而兼漕事則太祖

朝均州刺史襄州荆門至石門關兵馬都總管曹
翰兼西南面水陸轉運使襄州節度使潘美廬州
節度使尹崇珂同知廣州軍州事並兼嶺南轉運
使太宗朝右武衛大將軍濱州團練使知通利軍
王賓兼河北轉運使又以賓知揚州兼發運司真
宗朝定州駐泊都總管山南東道節度使同平章
事王顯兼河北水陸都轉運使顯總領定高陽三
路又領河北都轉運使副都總管侍衛馬步軍都

虞候天平軍節度使王超充轉運副使此皆武臣
任帥守兼漕也太祖朝知容州母守素知邕州范
旻通判桂州符嗣各知本管轉運事太宗朝知廣
州李符兼諸州轉運使知洪州王明兼江南西路
轉運使真宗朝知益州宋太初兼川陝四路都轉
運使參知政事判天雄軍府王欽若都大提舉江
北轉運使此皆文臣任帥守兼漕也始轉運一司
隸州縣與夫廢置皆在一時初無定制所掌者軍

需糧餉而已自高保寅知懷州州隸河陽時趙普
為河陽帥與保寅素有隙事多抑制保寅不能平
手疏請罷支郡會左拾遺李幹亦言諸州藩鎮支
屬州郡多俾親吏掌其關市頗不便於商賈滯天
下之貨望不令有所統攝以分方面之權尊獎王
室亦強幹弱枝之術也時太平興國二年也遂詔
邠寧涇源廊坊延丹陝號襄均房復鄧唐澶濮宋
毫鄆濟滄德曹單青淄兗沂貝冀滑衛鎮深趙定

祈等州先隸藩鎮令直屬京師郡長吏得自奏事
自是而後邊防盜賊刑訟金穀按廉之任皆委於
轉運使又節次以天下土地形勢俾之分路而治
矣繼增轉運使判官以京官為之於是轉運使於
一路之事無所不總也太宗淳化二年五月詔轉
運使司命常參官一人糾察州軍刑獄四年十月
詔刑獄司宜從省罷委轉運司振舉之以此知轉
運司總刑獄之事也真宗大中祥符二年五月廣

南西路轉運使言如洪寨主殿直李文著以輕兵
掩襲蠻賊文著中流矢死其隨文著將校八人本
司並斬訖七年八月梓州轉運使寇瑛言本使公
宇在梓遂州去戎瀘地遠或戎人緩急寇邊難於
照應請置資州詔從之以此知轉運司總邊防之
事也至道元年八月荆湖轉運使何士宗請執政
大臣出領外郡應合申轉運司公事只書通判以
下姓名太宗謂宰相等曰大臣品位雖崇若出臨

外藩即轉運使所部要係州府不係品位此朝廷
典憲不可輕改並仍舊貫由是觀之轉運使權可
謂重矣然又疑其權太重復置朝臣於諸路為承
受公事是機察漕司也真宗即位省罷承受之官
景德間遂建提點刑獄一司實分轉運使之權又
以武臣帶閤職者副之熙寧中議罷武臣提刑或
謂真宗時以武臣提刑令機察漕司也監司之官
既衆所領之職又分諸路復以知州帶一路安撫

鈐轄等名目自領軍事而轉運司所職催科徵賦
出納金穀應辦上供漕輦綱運數事而已仁宗慶
歷中患漕司權輕令帶按察使後二年江東漕臣
楊紘王綽與提刑王鼎頗務深刻號江東三虎其
餘刻轢州郡窘辱大臣者多矣朝廷又患之遂罷
轉運按察名皆非太宗真宗時委任轉運使意也
富弼等論帶按察使而不察司吏以朝會速配率
多為能又謂轉運使依資循例而入多非其人郡

縣官守因循人受其弊又謂不由舉主擇所以大半不才皆確論也然而太宗時轉運使皆人主親自選擇故淳化五年十一月上曰多士滿朝朕試令索班簿閱之周行之人魚貫櫛比不勝其衆矣比於其中求一才中轉運使三司判官者了不能得雖多亦奚以為臣以此知轉運使自人主親擇之也淳化三年正月詔宰相參知政事樞密副使三司使翰林學士尚書丞郎兩省給舍以上御史

中丞各於京朝官內保舉堪任轉運使者一人臣
以是知宰相執政侍從官皆舉薦人才而人主親
擇之也神宗謂文彥博等曰諸道帥臣轉運使職
任至重一道慘舒係焉宜謹擇其人久於其任漢
宣循名責實胥用此道彥博等對曰為治之要無
以易此故熙寧元豐諸路漕臣率多舉職今軍興
之際調度日繁理不可緩而諸路轉運使推擇非
才任用不一又非慶歷比也然臣區區之愚竊謂

太宗用李幹之言罷藩鎮支屬而委任轉運使真
宗朝士大夫論列言其不便者多矣仁宗景祐三
年十一月詔懷遠軍本隸宜州自今奏事無得專
達是亦復支郡之意也然以今日之勢觀之宜修
支郡之制增藩鎮之權以壯國勢而一道廉按之
任恐可改也神宗即位之初因知揚州徐緩告謝
甚哀嘗與富弼曾公亮輩議分置藩郡令按察支
屬而大臣無有能上當聖意者熙豐紹符崇觀政

宣更數十年不能行神宗之意盖有待於今日也
不然則願如太宗之時盡減監司之目獨存轉運
一司其親擢舉薦委任賜予悉用祖宗初制仍帶
按察之名其久任如真宗用宋搏於河東十有一
年不除代者勞效顯著則增秩賜金簡慢不職則
削官奪賜乘驛入奏更互赴闕以至給印歷却委
諸司一作州長吏書績皆以太宗真宗為法比之復
支郡利害固不同然亦愈於因循不振之弊也

安撫使

梁武帝普通五年魏以酈道元為大使慰撫六鎮大使
始此隋文帝開皇九年詔遣柱國韋洸安撫嶺外又仁
壽四年以楊素為并州道行軍總管河北道安撫大使
唐貞觀初遣大使十三人巡省天下諸州水旱則有巡
察安撫存撫之名
節度使兼之則有副使天
授二年發十道存撫使職
聖歷中狄仁傑為河北道安
撫德宗貞元間又置副使

宋舊不常置自咸平二年以翰林學士王欽若為四川

安撫使知制誥梁顥為陝西安撫使安撫使之名始此
其後景德三年始置河北沿邊安撫使以雄州守臣為
之而陝西沿邊諸州亦有安撫使慶歷二年詔置湖南
安撫司八年詔置河北四路安撫以韓琦王拱辰賈
昌朝等充諸路使皇
祐四年詔廣桂二州帶經畧安撫使熙寧五年罷諸路
經畧安撫司崇寧二年置河南安撫使宣和二年置輔
郡內潁昌府帶

京西安撫使

宣和三年臣僚言睦賊猖獗乞以杭越知州兼

本路安撫鎮撫一方詔杭越州江寧府守臣並帶安撫

使詔洪州守臣可依江寧府安撫使凡諸路安撫逐州知州兼以直祕閣以上充掌總護諸將統制軍旅察治奸宄以肅清一道凡兵民之政皆掌焉帥其屬而聽其獄訟頒其禁令定其賞罰稽其錢穀甲械出納之名籍其行以法若事難專決則具可否稟奏即干機速邊防及士卒抵罪則聽以便宜裁斷

係邊任則綏御夷狄撫寧疆圉若甲兵屯戍

粟餽運則視其緩急盈虛而移用之掌凡戰守之事

建炎元年李綱請沿河沿淮

沿江置安撫使兼馬步軍都總管以文臣充二年令將

兵處知州帶管內安撫使後省四年置鎮撫使罷逐路
安撫使後罷鎮撫使置安撫使如故時諸路又有安撫
大使自兩浙西路劉光世始二品以上為帥即為安撫
大使

提刑

宋太宗淳化二年以司門員外郎董循等一十一人分
充諸路轉運司提點刑獄四年省景德四年真宗謂王
旦曰朕慮四方刑獄官吏未盡得人一夫受冤即召災

沴今軍民事務雖有轉運使且地遠無由知先帝嘗選
朝臣為諸路提點官獄今可復置仍以使臣副之於是
置諸路提點刑獄公事以朝臣充始命屯田李拱為之
副以武臣閤門祗候以上充天禧四年加勸農使俄改
提點刑獄勸農使又以武臣為副使天聖六年悉罷明
道二年復置嘉祐中有武臣同提點河東刑獄竊用公
庫銀器及樂倡首飾議者謂武臣不可為監司罷之治
平元年罷提點刑獄而委轉運司熙寧二年諸路提點

刑獄復差文臣其武臣並罷

史臣曰上以武臣罕習吏文多不足以舉察所部人

材故罷之人

皆以為便 十年復置提點京畿刑獄掌察所部疑留

獄訟勸課農桑而按其官吏之不法別其廉吏以達於

朝元豐因之總郡國之庶獄核其情實而覆以法督治

姦盜申理冤濫則隸提刑司歲察所部廉能而保任之

若疲軟或冒法則隨其職事劾奏宣和初詔江西廣東

增置武提刑一員然遇闕帥不許武憲兼攝建炎元年

以盜賊未衰諸路無武臣提刑處權添差一次專管提

殺四年罷之孝宗乾道六年詔諸路分置武臣提刑一員臣僚乞依故事加同字不從於是武憲橫於四方淳熙末上知其不便遂不復除止除朝臣一員其屬有幹辦公事一員檢法官一員

東萊呂氏曰太宗皇帝即位之久天下無事淳化二年五月詔應諸路轉運使各命常參官一人專知糾察州軍刑獄公事管内州府十日一具囚帳供報有疑獄未決即馳傳以示之郡縣敢稽留大

獄久而不決及偏辭按讞情不得實官吏用情者
並以聞佐史小吏已下得以便宜按劾從事此初
置外路刑獄官之詔也是時猶隸轉運司然行之
二年勞擾無補於是淳化四年十月降詔曰比者
申命使臣分聽獄訟徒經歲序蔑有平反既莫副
於哀矜諒祇為於勞擾其諸路決遣刑獄司宜從
省罷委轉運司振舉之真宗景德四年乃謂先帝
常選朝臣諸路提點刑獄遂復置之不隸轉運別

為一司稍重其權矣當時約束曰所至專察囚禁
詳審案牘州縣不得迎送聚會所部每旬具繫囚
犯由訊鞠次第申報當檢舉催督在繫淹久者即
馳往案問出入人罪者移牒覆勘官吏以聞諸
色詞狀逐州斷遣不當已經轉運司披斷未允者
並收接施行官吏貪濁弛慢者具名以聞敢有庇
匿並當加罪仍借緋紫以三年為任增給緡錢如
轉運使之數內出御前印紙為歷書績效中書樞

密院籍其姓名代還者課議功行賞如刑獄枉濫不能摘舉官吏弛慢不能彈奏務從畏避者寘以深罪竊覩當日詔旨專為刑禁詞訟冤枉天禧中已兼勸農一事至仁廟朝天聖六年正月詔令諸路提點刑獄司朝臣使臣交割本職公事與轉運使副令轉運司條所省事件以聞既罷兩年天聖八年九月復置仍令所至毋得送迎其吏人約舊數裁減之降詔十月九日是月壬申却權罷又三

年至明道二年冬復置自後提刑一司雖專以刑
獄為事封樁錢穀盜賊保甲軍器河渠事務浸繁
權勢益重而轉運司所總惟財賦綱運之責而已
司局愈多官吏益衆而事愈不治今日之弊正在
按察之官不一也臣故著提刑廢置約束之詳以
備朝廷採擇

提舉

即漢耿壽昌常平之任也自衛李惺制平糴之法漢人

因之則謂之常平焉然漢人特置倉而猶領之於大司農也

宋朝淳化中建常平倉景祐元年令轉運司舉長史舉所部官專領之然猶隸漕臣熙寧遣使提領此蓋提舉

常平之所始也

三年制置三司條例言河北陝西已差官提舉常平廣惠倉餘路欲差胡朝宗

張復侯叔獻曾誼等並為提舉官

九年府界畿內亦專置提舉常平倉

一員不令司農丞兼領提舉常平司操常平斂散之法

申嚴免役之政令治荒修廢賑民艱阨則隸提舉司歲

察所部廉能而保任之若疲軟或犯法則隨其職事劾

奏

又哲宗正史職官提舉常平司常平義倉免役市易坊場河渡水利之法因民之有無歲之豐凶而歛散

賤濟之凡役錢視其產之厚薄人吏廩祿視其執役之輕重凡市易掌斂市之不售貨之滯於民用者乘其貿易以平物價皆舉行其政令以裕民力而阜邦財掌按察官吏之事

元祐初罷紹聖九年

復置政和改元詔江淮荆浙六路共置茶鹽提舉一員

宣和三年詔河北京東路推行新法鈔鹽可添置提舉

官一員此提舉茶鹽之所始也

國朝茶鹽事舊隸發運司元豐間或以轉運常

平官兼提舉或以提刑兼領知通提轄政和以後始專置官吏

既而諸路皆置建炎元

年詔提舉常平司併歸提刑司二年八月復諸常平官
還其糴本自青苗錢不散外常平免役之政皆掌之三
年復置四年詔逐路提刑司茶鹽司並依舊分東西路
紹興二年詔荆湖北路復置提舉茶鹽司四年詔廣西
茶鹽司官吏並罷其職事委漕臣五年詔諸路提舉常
平併入茶鹽司仍以提舉常平茶鹽等公事為名九年
置經制司改常平官為經制某路幹辦常平等公事未
幾經制司罷復為常平官久之復置提舉東南以茶鹽

司兼領四川以提刑司兼領

又中興系年錄紹興十五年戶部侍郎王鐵言常平

法望復置提舉官乃命諸路茶鹽官改充提舉常平茶鹽惟四川廣西以憲臣淮西京西以漕臣兼領乃令檢察所部州有擅用常平錢物者按劾以聞乃別置官吏然常平錢皆取以贍

軍今特掌義倉及水利役法賑濟等事而已無復平糴之政矣熙寧初置提舉常平司勾當公事於通判幕職內選差一員不妨本職紹興十五年改為幹辦公事依漕屬例此常平幹也宣和三年置茶鹽提舉屬官一員此茶鹽幹也故提舉司存二幹官以此

文獻通考卷六十一